

Durante Fiesta Tipico den Bario na Centro di Bario Noord

A brinda reconocimiento na Sr. Erick Uchman

Diadomingo pasa a tuma luga e Fiesta Tipico den Bario cu ta wordo organisa desde maart 2023 pa Fundacion Union Tipico Rubiano UTR, cu e meta pa promove nos musica Tipico den nos dushi barionan di Aruba y asina mantene nos folklore bibo y traspasa esaki pa e generacionnan mas hoben. Durante e fiesta aki ta e custumber cu Minister di Cultura ta reconoce un baluarte di e bario. E biaha aki na Centro di Bario Noord a toca Minister Maduro e placer pa brinda un reconocimiento na Sr. Erick Uchman pa su contribucion y dedicacion pa mantene y promove nos musica cultural.

Aki ta sigui e discurso di Minister Maduro na ocasion di reconocimiento di Sr. Erick Uchman.

“Sr. Erick su biografia di bida ta un testimonio di dedicacion, di entrega, y di amor pa e comunidad Arubano. Despues di 35 aña di servicio militar Hulandes, Sr. Uchman a tuma e decision di bay cu pensioen y hunto cu su casa Sra. Diana a bin establece su mes na Aruba y bira parti di nos comunidad Arubano.

Durante su hubentud, Sr. Erick ta haya su formacion



escolar na Abraham de Veer School y Juliana School. Su pasion pa musica a florece for di tempran, e ta siña toca sinfonia di boca na e edad di 11 aña, sigui despues pa siña toca acordeon cu su 15 aña. Un instrumento cu e ta sigui toca te cu awe. E talento musical di Sr. Ericka florece na tal manera cu el a forma parti di varios grupo musical conoci manera Tipico Arco Iris y actualmente e ta forma parti di Tommy y su Grupo. Sr. Erick a comparti escenario (tarima) musical cu legendarionan Arubano manera Etty Toppenberg den feliz memoria, Patan Farro, Chonai Faro, Nito Franken, Boysie Croes den feliz memoria y Tommy Figaroa.

Ta un custumber cu tabata duna presentacion riba celebracionnan di Dia di Mama, Dia di Tata, Dia di Himno y Bandera, Dia di Betico, Pasco y Dia di San Juan-Dera Gay.

Erick, no solamente su maestria musical ta algo notabel, pero su spirito generoso di servicio ta digno di aplauso. Durante e añanan, Sr. Erick a contribui incansablemente na varios organizacion y institucion, na e.o. Centro Kibrahacha, FAVI, Cas Marie, Imeldahof, Misa di Noord, Cayena Kleuter School, Kerki Protestant, St. Michael Paviljoen, Respaldo, Ambiente Feliz y Cas di Machi y

hopi mas. Su musica a yega na e curason di muchanan, grandinan, como tambe esnan cu ta lucha cu desafio, y e manera cu Erick ta comparti su musica cu un sentimiento profundo, ta algo cu lo keda den nos memoria colectivo.

Den e epoca di pandemia Covid, Sr. Uchmann, hunto cu grupo musical, a bishita nos grandinan isola den nan cas, usando su talento pa keda uni y combati e soledad. Su participacion den e Concierto Donny Laclé y e famoso “Caha di Glas” a duna oportunidad na hobennan cu talento pa haya e apoyo financiero necesario pa sigui nan trayecto musical.

Pero Sr. Erick su entrega no ta limita na musica so. Como un pensionado cu un spirito di servicio, el a dedica hopi ora pa asisti y yuda or-

ganisacionnan comunitario y deportivo (manera Animal Shelter, Santuario di Burico, Imelda Hof, IDEFRE, den e area deportivo, e ta fundador di Liga Mini Baby y Baby den futbol, dirigente /entrenador di Olimpico, Nacional, Mercurius, Aruba Juniors).

Sr. Erick, bo bida ta un ehempel di entrega total na nos comunidad. Awe hunto cu tur esnan presente nos ta honra bo legado, no solamente como un musico talentoso, pero como un lider cu ta inspira un generacion pa sigui bo pasonan. Cu hopi emocion y gratitud, na nomber di nos Pueblo y Gobierno, nos ta reconoce y gradici bo pa tur e dedicacion cu bo a musta. Masha masha danki pa tur loke bo a haci y ta sigui haci na mantene y promove cultura di nos pais.”

Charline Tromp ta empleado superior di Aruba Bank

Charline Tromp ta empleado superior di Aruba Bank pa luna di augustus 2024. Un empleado cu a demostra dedicacion y iniciativa sobresaliente, logrando asina e reconocimiento aki.

E compromiso di Charline pa semper brinda un experiencia superior na e clientenan di Aruba Bank cu ta refleha e balornan di e banco. Su accionnan ta impacta e clientenan positivamente y ta pone un standard haltu pa e excelencia di servicio na cliente.

Charline ta gusta disfruta di un dushi kopi koffie, hañando tranquilidad den su calor y aroma, tin biaha compaña cu un musica suave.

Pabien Charline pa ta un empleado ehemplar cu ta forma parti di Aruba Bank.

